



*Selasa, 25 Juni 2024*  
**Ogen: Hagai 2:1-9**



**Teruskanlah Dahin E**



**K**egeluhén arus terus idalani, mata natap ku lebe dingén paksa si lepas jadi sada pengalamén, persinget, pelajaran mabai geluhta reh ulina. Erbage-bage kecibal geluhta, sikugapana pe si jadi, kerina e labo lit si sea-sea. Kerina erguna adi nggit kita erlajar dingén ngergai pengalamén si lit. Bagenda me kegeluhén kalak Israel, kenca mulih ipembuangan nari. Enggo piga-piga dekah ia seh i Jerusalem, kerina ergiag-giah menata kegeluhenna, mbangun rumah ras sidebanna tapi lupa ia nandnagi rumah pertoton. Nabi Hagai mpersingeti ia, e maka ibenaken ka me majekken rumah pertoton e, rencana ulin asa sienggonna, sinai enggo iruntuhkan bangsa sinaluken ia. Perentah enda langsung isehkenna man Serubabel gubernur Juda, imam simbelin ras bangsa Israel. Gelah kerina sikap nerusken dahin mbangun rumah pertoton e, rencana pe enggo ilitken, kenca ibenaken isuruh me neruskenca, ndahiken mbangunca. Janah bagi padan Dibata sope sie, maka bangsa-bangsa sideban pe maba ertana guna ipake mbangun rumah pertoton e. Kerina siilakoken bangsa enda guna kemulian Dibata. Selaku bangsa si patuh, ibere Dibata kesenangan ras dame nandangi bangsa enda. Tentuna berita ras padan siisehken nabi Hagai enda, maba keriahen nandnagi bangsa sinterem e. Padan Dibata tetap maba kedamen ras kesangapén man bana.

Nerusken dahin, arus tetap ilakoken, ula sempat lolo silakoken kita. Bageme ibas kegeluhenta subuk ibas jabu, pelayanen gereja rikut pendahinta sekalak-sekalak melala denga dahin si langa erkedungen arus iterusken. Ibas sienda ngajuk ras mpersingeti kita ula kal mpersilahang Dibata ibas kerina silakoken kita. Tetap erpersukutun man Dibata gelah dahin silakoken kita e pe mehuli perdalanenna terlebih ngena ate Dibata ulihna. Kesenangn jadi baginta.